



Inuit Ataqatigiit Inatsisartuni

22. april 2008

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpunga:

Siullermik:

Ukioq manna saarullittassanik agguaassineri suut tunngavigineqarpat aamma aalisagartassiissutinik agguaassineri tunngavigineqartartoq suna tunngavigalugu ukioq manna malinneqanngila ?

Aappasaanik:

Sooq ukiuni siuliini aalisartut ineriartorumallutik imaluunniit aalisarnermut allamut ikaarsaarumallutik aalisagartassanik qinnuteqartarsimasut itigartinneqartarsimappat ?

Pinngajussaanik:

Sooq pinngortitaleriffiup inassuteqaataa malinnagu akerlianik pisassat pingasoriaammik qaffanneqarpat ?

(Inatsisartuni ilaasortaq Ane Hansen)

Tungavilersuut:

Ukioq manna saarullittassat agguaanneqarnerani eqqumiiginartunik arlalinnik pisoqarpoq. Siullermik Pinngortitaleriffik saarullit amerliartorneranik takussutissat amigarineqarmata ukioq manna pisassiisoqanginnissaanik inassuteqaraluartoq, Naalakkersuisut pisassat pingasoriaata sinnerlugu pisassiissuteqarput. Tamatuma qaavatigut pisassiineri agguaassineri ukiorpasuarni tunngavigineqartartoq qimanneqarsimavoq, siornatigut pisassanik agguaassineri tunngavigineqartatut ilisimasagut ukuupput:

1. Pisassanik agguaassineri aalisariutit ukiuni siuliini pisassaqaarsimasut taamaaqataanik agguarneqartarput.
2. Pisassiissutit sinneqarpata aalisariutit pioreersut amerlanerusunik pisaqarnissamik pisinnaasallit pisariaqartitsisullu agguarneqassapput.
3. Agguaassinerit qulaani taaneqartut tunngavigalugit agguaassineri pisassiissutit aallaveqassapput aalisartitseqatigiit akilersinnaasumik ingerlanneqarnissaannut, pisassiissutit aningaasatigut nalingi ingerlatap aningaasatigut napatissinnaanissaanut qulakkeerinnissallutik, aammalu aalisartitseqatigiit pioreersut assigiissagaasumik pisassat nalingisa anertussusilersorneqarnerisigut.
4. Aalisartitseqatigiiffimmuut nutaavinnut pisassiisoqarsinnaanngilaq ukiup ilivitsup iluani aningaasaqarnikkut imminut napatilluni aalisarsinnaanermik qulakkeerinnissinnaanngikkaanni.

Pisassanik agguaassinermi tunngavigineqartartut ilisimasagut taakkuugaluartut takusinnaavarput agguarneqarsimasuni peruserineqartartut tunngavigineerussimasut, tamanna aalisartut akornanni aammalu politikkerit akoranni toqqissisimannnginnermik oqallinnermillu tunngavissaqarnersumik nalunartumik aallartitsivoq. Tassami ilaatigut aalisarnermik suliaqartut akornanni nunatsinni Danmarkimilu oqallisigineqarpoq pisassat suli aalisariutaateqanngitsunut tunniunneqarsimasut tuniniarlugit niuerutigalugillu aallartinneqarsimasut, oqallinnerit taamaattut ilumoorsimappata tamatsinnut isigineqarnitsinnut pitsaanngilluinnartumik sunniuteqassapput.

Tamatuma saniatigut ilisimavarput siorna kalaallit aalisartut nalituunik aalisariutaateqareersut raajarniarnermi pissutit pitsaajunnaariartornerat pissutigalugu ingerlaqqikkumallutik aalisarnermut allamut ikaarsaarumallutik saarullittassinneqarnissamik qinnuteqartut arlallit itigartitaasimasut, ilaatigut ilaasa akiliisinnaajunnaarneranik kinguneqartumik. Soq taakkua agguaassinermi isiginiarneqaratik ingerlatseqatigiiffiit nutaat sulilu aalisariutaateqanngitsut pisassanik anner-tuunik tunineqarpat. Ilanngullugu paaserusunnarpoq aalisartitseqatigiiffiit nutaat piginnittumik-kut qanoq katitigaanersut.

Maluginiagassanut ilaavoq kalaallit aalisartitseqatigiiffiat Royal Greenland pisassinneqarnissamik annikinnerungaartumik tunineqarsimasoq, naak Royal Greenland nunami suliaqartitsiner-mi pingaarutilittut inissisimagaluartoq, Naalakkersuisut Royal Greenland qanoq ingerlaqqis-sasoq takorlooramikku.

Inuit Ataqtigiinni pingaartipparput nutaanik pisassiisoqassappat aalisartunut inuusuttut aallar-tikkusuttut salliunneqassasut, pisassanik agguaassinermi inuusuttut qassit tunineqarpat.